

Dževad Drino*

Međunarodna naučna konferencija „Bosna i Hercegovina i euro-atlanske integracije-trenutni izazovi i perspektive“,Pravni fakultet Univerziteta u Bihaću,Bihać,9-10.maj 2012.godine /prikaz skupa/

Pravni fakultet Univerziteta u Bihaću je obilježio Dan Evrope ali i dan antifašizma deveti maj,upravo prigodnom organizacijom međunarodne naučne konferencije posvećene trenutnim izazovima i perspektivama bosanskohercegovačkih i euro-atlanskih odnosa,koja je okupila eminentan broj istaknutih znanstvenika iz oblasti prava ali i ostalih društvenih nauka.Domaćin je ovom organizacijom potvrdio tradicionalnu krajišku gostoljubivost,a početak rada skupa su pozdravili premijer Vlade Kantona i naš kolega doc.dr. Hamdija Lipovača,ректор Univerziteta prof.dr. Refik Šahinović,mr.Husein Rošić,predsjedavajući kantonalne Skupštine,uz sveprisutnog dekana bihaćkog Pravnog fakulteta i vrijednog domaćina skupa prof.dr. Nevzeta Veladžića.Organizatori su uspjeli obezbijediti visok nivo uvodničara skupa u ličnosti generala Gary Hoffmana,zapovjednika NATO štaba u Sarajevu,te ambasadora SAD i Turske,nj.e. Patricka S.Moouna i Ahmeda Yildiza,čija su otvorena i jasna izlaganja izazvala živu znatiželju među svim prisutnim na skupu. Pored visokih zvanica,uvodne referate na plenarnom dijelu skupa podnijeli su doajen bosanskohercegovačke politikološke misli prof.dr. Mirko Pejanović,sa Fakulteta političkih nauka iz Sarajeva ,te uvijek zanimljivi izlagač prof.dr. Nedžad Bašić sa bihaćkog Pravnog fakulteta,da bi se potom prešlo na rad u dvije odvojene sesije. U prvoj sesiji –„NATO,glavni subjekt u osiguranju sigurnosti“, (izvrstan i elokventan moderator-dr John Olsen),većinu saopćenja su podnijeli

* Doc.dr. Dževad Drino, Pravni fakultet Univerziteta u Zenici.

predstavnici NATO štaba iz Sarajeva, dok je znatno življi dio skupa predstavljao rad drugog modula- „Pravni, ekonomski i historijski aspekt euroatlanskih integracija“, kojim je vispreno moderirao prof.dr. Enes Hašić. Na sesiji su razmotrene i dvije historijsko-pravne teme; Dženana Čaušević je prezentirala rad „Evropske integracije i BiH-historijski pregled“, dok je gost iz Zenice Dževad Drino referisao „Historijsko-pravni aspekti razvitka ideje evropskih integracija od antike do evropske moderne“, što je prihvaćeno sa zanimanjem. Gosti sa Pravnog fakulteta iz Osijeka, mr.sc Helga Špadina i prof.dr. Mario Vinković su obradili teme o prevenciji trgovine ljudima te prostituciji, dok je dekan Pravnog fakulteta iz Zenice prof.dr. Halid Kurtović, upravo na primjeru egzaktnih podataka iz Kazneno-popravnog Zavoda Zenica, uradio zanimljivu ekonomsku analizu troškova u krivičnom pravu. Rad sesije su upotpunili svojim saopćenjima gosti iz Sarajeva, mr. Muhamed I. Mujakić, sa Fakulteta javne uprave i doc.dr. Suad Kurtćehajić sa Fakulteta političkih nauka, dok je zamijećeno tradicionalno odsustvo predstavnika Pravnog fakulteta iz Sarajeva. Idućeg dana, pod moderiranjem prof.dr. Genca Trnavcija, nastavljen je plenarni rad sa izlaganjem gostiju iz Zagreba (Prof.dr. Josip Kregar, Vilim Bouček i Mladen Nakić), Osijeka (prof.dr. Zvonimir Lauc), Skoplja (doc.dr. Sejdefa Džafče), Rijeke (mr. Budislav Vukas, mlađi), dok su kvalitetna izlaganja o razumijevanju procesa pristupanja Evropskoj uniji podnijeli Doc.dr. Armin Krdžalić, Centar za sigurnosne studije Sarajevo, i posebno nastavnica domaćeg Pravnog fakulteta kolegica Amela Čolić. U zaključcima Konferencije, svi učesnici su se složili da je sama Konferencija predstavljala značajan doprinos razumijevanju i približavanju ideje euroatlanskih integracija a posebno razmatranju nove uloge NATO na ovim prostorima, o čemu su referisali eminentni predstavnici kako pravne i uopće društvene znanosti, tako i diplomatije i štaba NATO iz Sarajeva.

Organiziranjem ovoga skupa Pravni fakultet Univerziteta u Bihaću se iskazao kao odličan domaćin, ali i kao kolektiv koji je u stanju iznijeti organizaciju i većih i zahtjevnijih skupova, što do sada nije bio slučaj, pa ova vidljiva i značajna promjena raduje svakog dobronamjernika. Učesnici su bili jednoglasni u izjavi da je upravo Bihać, kao naš najzapadniji Univerzitet, prirodno i pozvan da bude tradicionalni domaćin i centar ovakvih skupova, što je sa neskrivenim zadovoljstvom podržano kako od domaćina, tako i od svih gostiju, pa je za očekivati ustrojstvo i jednog lijepog budućeg tradicijskog druženja.